



UTL AT DOWNSVIEW



D RANGE BAY SHLF POS ITEM C
39 10 12 02 10 018 7



4-71
BP
70
S57
1896

Sirri Paşa, Giritli
Tabakat

PLEASE DO NOT REMOVE
CARDS OR SLIPS FROM THIS POCKET

UNIVERSITY OF TORONTO LIBRARY

3559

4/116

Sırrı Paşa, Giritli

طبقات الادب المفسر

Tabakāt ve ādāb-ı
müfessirīn
سری کبری

معارف عمومیہ نظارت جلیلہ سنک ۲۹ ذی الحجہ
سنہ ۱۳۱۳ و ۳۰ نیسان سنہ ۱۳۱۲ تاریخ و ۱۶۸
نومرولی رخصتنامہ سنی حائزدر

در سعادت



۱۸۹۶

۱۳۱۲

BP
70
557
1896



سری پاشا مرحومك متروكات قلميه سندن اولان (طبقات
 و آداب مفسرین) مشار اليهك سورة مریم عليها السلام ایچون
 (سر مریم) عنوانی آلتنده ترکیه کشیده زرتار بلاغت
 ایلدیکی بر تفسیر شریفه مقدمه مقامنده یازلمشسه ده سر مریمك
 طبعی دها بر خیلی زمانه محتاج اولدیغندن بونك آندن تفریق
 و آیروجه بر رساله شکننده طبعیله مرحومك مشتاقان آثار
 خامه سنه اتحاف اولتمسی مناسب کورلمشدر .

ذیل رساله ده صاحب اثرک ترجمه حال شرف اشتمالیده
 مختصراً پیرایه ضمیمه تقدیر ایدلمشدر .

محمد علی عینی

۲۲ نisan سنه ۳۱۲ حیدرپاشا



بِسْمِ اللَّهِ الرَّحْمَنِ الرَّحِيمِ

علم تفسیر

«علم تفسیر» الفاظ قرآنیہ نك کیفیت نطقندن ، مدلولات لغویہ و اصطلاحیہ سندن ، [۱] احکام افرادیہ و ترکیبیہ سندن ، [۲] حال ترکیبہ الفاظ مذکورہ یہ محمول اولان معانی ثنائیہ سندن ، [۳] معرفت نسخندن ، سبب نزولدن ، مبہمی موضوعہ لردن بحث ایلر .

[۱] مثلا : صلوات کبی ، کہ معنای لغویسی دعادر . معنای اصطلاحیسی ده افعال مخصوصه وار کان معلومه دن عبارتدر .
[۲] احکام افرادیہ ، الفاظ قرآنیہ نك جهات صرفیه و اشتقاقیه سی - احکام ترکیبیه ده جهات نحویه سی در .

[۳] علم معانی یہ نسبتله ، (معانی ثنائیه) متکلم کلامنده تعریف ، تکبیر ، تقدیم ، تأخیر کبی بر طاقم خصوصیات ابراد ایتمکه داعی اولان اعتراضدن عبارتدر . نته کیم (معانی اول) ده بو خصوصیات ایله برابر اصل معنادن عبارتدر .

علم بیانه نسبتله (معانی ثنائیه) ، معانی مجازیہ و کنایه دیمکدر . نته کیم (معانی اول) ده مقتضای حاله رعایتله برابر مدلولات مطابقه دیمکدر .

§

طبقات مفسرين

برنجی طبقه

صحابه کزيبه

خلفاء اربعه ، ابن مسعود ، ابن عباس ، اُبيّ بن كعب ،
 زيد بن ثابت ، ابو موسى الاشعري ، عبدالله بن زبير ، انس بن
 مالك ، ابو هريره ، جابر ، عبدالله بن عمرو بن العاص .
 رضوان الله عليهم اجمعين .

علی بن ابی طالب

خلفاء اربعه ایچنده روایت تفسیر ایله اڭ زیاده آفاق کبر
 اشتهار اولان علی بن ابی طالب کرم الله وجهه و رضی الله
 عنه حضرت تلیدر . دیگر اوچندن روایت تفسیر ، جبداً
 نادر در . بونک سببی ده خلفاء ثلاثه مشار الیه مک تقدّم
 و فاتر تلیدر . اما حضرت امام علیدن نیجه ذوات ستوده سمات ،
 روایت تفسیر ایله احراز دستمایه سعادات ایتشدر . ابن
 مسعودک « رضی الله عنه » تواتریاب اشتهار اولان : (إِنَّ الْقُرْآنَ
 أَنْزَلَ عَلَى سَبْعَةِ أَحْرَفٍ مِمَّا مَنَّا حَرْفٌ إِلَّا وَلَهُ ظَهْرٌ وَبَطْنٌ وَإِنَّ

عَلِيًّا رَضِيَ اللَّهُ تَعَالَى عَنْهُ مِنْ الظَّاهِرِ وَالْبَاطِنِ (كَلَامِي)
جناب مرتضى حنقله بر شهادت صادق قدر .

ابن مسعود

بو ذات فضائل مآئتن ايديلن روايات ، حضرت امام
عليدين منقول اولان رواياتن ده زياده در . ابن مسعود
« رضى الله عنه » (٣٣) اوتوز اوچ سنه هجرية سنده مدينه
منورده ارتحال دار بقا ايتشدر .

عبدالله بن عباس

ترجمان القرآن ، حبر الامه ، رئيس المفسرين القاب
ساميه سيلاه ممتاز صحابه گزيندر . « رضى الله عنهما » (٦٨)
آلتمش سکنز سنه هجرية سنده وفات ايدوب طائفده دفن
اولمشدر . صاحب القرآن ، صلى الله عليه وسلم افندمن
حضر تلرينك : (اللَّهُمَّ فَقِّهْهُ فِي الدِّينِ وَعَلِّمَهُ التَّأْوِيلَ) دعاسنه
مظهر يتله علم تفسيرده مشار بالبيان اولمش ، گنديسندن
روايت ايدنلرک عددى همان صاييله ماز بردر جه کثرته وارمشدر .
حبر مشار اليهدن روايت تفسير ايدنلر ايچنده (١٤٣)
يوز قرق اوچده وفات ايدن علي بن ابى طلحه الهاشمينك

طریق احسن طُرُق اولوب امام بخاری دخی صحیحینده
آکا معتمد اولمشدرد .

خبر مشارالیه منتهی اولان طُرُق جیده دن بریسی ده
(۱۲۰) یوز یگرمی سنه سننده وفات ایدن قیس بن مسلم
الکوفینک عطاء بن السائب دن اولان روایتک طریقیدر .
صاحب سیر ، ابن اسحاقک طریق ده او طُرُق جیده دندر .

الثاباغیلری (۱۴۶) یوز قرق آتیده وفات ایدن کلینک
طریقیدر .

کلینک اسمی محمد بن السائبدر . (۱۵۰) یوز الیده وفات
ایدن مقاتل بن سلیمان بن بشر الازدینک طریق ده آتک گیدر .
شوقدر وار ، که مقاتلک روایتده کی مذاهب ردیه آنده
موجود اولماق حسبیله کلینک طریق بوکامر جیددر .
(۱۰۲) یوز ایکیده وفات ایدن ضحاک بن مزاحم الکوفی ایسه
حضرت ابن عباسک شرف ملاقاتنه نائل اوله مدیغندن بونگاه
خبر مشارالیهک آره سننده طریق روایت منقطع در .

أَبِي بِنِ كَعْبٍ

علی اختلاف (۲۰) یگرمی تاریخنده ارتحال دار بقا ایدن

أبي بن كعب « رضی اللہ عنہ » حضرت تلرندن بر نسخہ کبیرہ منقولدر ، کہ آتی ابوالجعفر الرازی ربیع بن آنس ، اوده ابوالعالیه واسطہ سیلہ صحابی مشار الیهدن روایت ایتمشدر . ایشته بو بر اسناد صحیحدر . صحابی مشار الیه عهد هایون حضرت رسالتپناهیده قرآن عظیم الشانی جمع ایلین درت ذات خُجسته صفاتک بریسیدر . اقرأ الصحابه وسید القراء ایدی .

انس بن مالک

(۹۱) طقسان برده بصروده وفات ایتمشدر .
« رضی اللہ عنہ »

ابوهریره عبدالرحمن بن صخر

علی خلاف (۵۷) الی یدیده منینه منورده ارتحال داربقا ایتمشدر .
« رضی اللہ عنہ »

عبدالله بن عمر بن الخطاب

(۷۳) یتمش اوچ سنه هجریه سنده مکة مشرفهده وفات ایتمشدر .
« رضی اللہ عنهما »

جابر بن عبدالله الانصاری

(۷۴) یتیمش در تده مدینه منوره ده وفات ایتمشدر .
« رضی الله عنه »

عبدالله بن عمرو بن العاص السهمی

(۶۳) آتمش اوچ تاریخنده وفات ایتمشدر . آخر عهد
صحابه ده امر علم کندیلرنده استقرار ایلین عبادله اربعه دن
بریدر . « رضی الله عنه »

زید بن ثابت الانصاری

(۴۵) قرق بشده وفات ایتمشدر . کاتب النبی ایدی ،
« رضی الله عنه »

بوذوات ستوده سمات هر نه قدر مفسرین صحابه دن معدود
ایسه لرده کندیلرندن منقول اولان روایت تفسیر ، شیء یسیردر .

§

ایکنجی طبقه

تابعین

اصحاب ابن عباس

(۱) مجاهد بن جبرالمکی — اجله مفسرین تابعیندندر .

غایتله زاهد ، عابد برذات ستوده سمات ایدی . زمان خلافت جناب فاروقده وهجرت نبویه نك یکر می برنجی سالی خلانده مکة مکرمه ده دنیاه ککش و (۱۰۳) یوز اوج سنه هجریه سنده بنه اوراده وفات ایتشدرد . کنیه سی ابوالحجاج ، پدر نك اسمی ده صیغه تصغیر ایله (جبیر) درده دینلدی . مومی الیهک : « قرآنی ابن عباس حضر تلیزیه اوتوز کره عرض ایتشمدرد » دیدیکی مرویدر . امام شافعی ، امام بخاری مفسر مشار الیهک تفسیرینه اعتماد بیورمشلردرد . « رحمه الله »

(۲) سعید بن جبیر — زهد و عبادتله شهرت شمار اولان
اعلام رواتک بریدر . (۹۴) طقسان درنده ، یاخود (۹۵) طقسان
بشده آنی حجاج ظالم شهید ایتشمدرد . حجاج ایله قصه سی مشهوردرد .
(رحمه الله)

(۳) عکرمه — بواسم حمامه معناسنه اولان عکرمه دن
منقولدر . مومی آیه عکرمه بن عبدالله البربری ، ابن عباس حضر تلیز نك
آزادلیسی و علم تفسیر و حدیثده مقتدی به اولان ائمهدن و فقهای
مدینه دن برینی در . (۱۰۵) یوز بشده ، یاخود (۱۰۷) یوز دیدیه
مکة مکرمه ده وفات ایتشمدرد . (رحمه الله)

(۴) طاوس بن کیسان الیمانی — کنیه سی ابو عبدالرحمن
الجمیری در . اصل اسمی : (ذکوان) در . طاوس لقییدر ده دینلدی .
فقیه . فاضل برذات ایدی . (۱۰۶) یوز آتی سنه سنده کذلک
مکة مشرفه ده وفات ایتشمدرد . (رحمه الله)

(۵) عطا بن ابی رباع المسکی — ثقات فقهادن اولوب لکن

کثیرالارسال ایدنی . یعنی روایت حدیث ایدرکن سائر محمدینک دآب شریفلری اوزره : « حدثنا فلان عن رسول الله » دیمیوب حذف اسناد ایله یالکیز : « قال رسول الله » دیر ایدی . (۱۱۴) یوزاون درتده وفات ایتمشدر . (رحمه الله)

§

اصحاب ابن مسعود

(۱) علقمة بن قیس — کتب تفاسیر واحادیثده (علتمه) مطلق اوله رق ذکر اولندقده مقصود بوذاتدر ، که مشاهیر علماء تابمیندن آتی الترجه ابراهیم النخعی نک والده سنک عمجه سی علقمة بن قیس بن عبدالله النخعی در . « ابوسبیل » دبه کنیه لئیردی . اصلا اولادی اولمامشدر . علماء اعلام ، مومی الیهک جلات شاننده متفق الکلامدر . شکلاً ابن مسعود حضر تلرینه زیاده بکیزردی . تاریخ وفاتی مختلف فیه در . (۶۲) التمش ایکیده ، (۷۰) یتمشده ، (۱۰۲) یوزایکیده ده دینلر واردر . (رحمه الله)


علقمة بن وقاص اللیثی ایسه اصحاب کرامدن اولوب عهد هایون نبویده طوغمش و خندق غزاسنده حاضر بولنوب عبدالملک بن مروانک ایام سلطنتنده مدینه منوره ده ارتحال داربقا ایتمشدر . (رضی الله عنه)

(۲) اسود بن یزید النخعی — عابد مشهوردر . هرایکی کیجه ده بر قرآنی ختم ایدردی . (۷۴) یتمش درت ، یاخود (۷۵) یتمش بش سالنده وفات ایتمشدر . (رحمه الله)

(۳) ابراهیم النخعی — ابراهیم بن یزید بن قیس بن الاسود

بن عمرو بن ربیعۃ النخعی الکوفی در . عصر نده ریاست علمیه بی احراز
ایتمش فاضل ، زاهد بذات ایدی . ام المؤمنین حضرت عائشه بی
« رضی الله عنها » کورمک شرفه نائل اولمشدر . (۹۵) طقسان بش ،
یاخود (۹۶) طقسان آلتی تاریخنده وفات ایتمشدر . (رحمه الله)

(۴) شعبی — ابوعمرو عامر بن شراحیل — یاخود —
ابن عبدالله بن شراحیل در . کوفه لی برتابعیء جلیل الشاندر . بک چوق
صحابهء کرامدن روایت حدیث ایتمشدر . حتی بشیوز قدر صحابهء کزینک
شرف ملاقاتنه نائل اولدینی کندیسندن مرویدر . حضرت عثمانک
(رضی الله عنه) خلافتنک التبعی سنه سنده ایدی ، که زینتساز بزم
وجود اولمش وسن شریفلری سکسانی متجاوز اولدینی حالده (۱۰۳)
یا (۱۰۴) یا (۱۰۵) یاخود (۱۰۶) سنه سنده وفات ایتمشدر .
طبعی برآز مزاحه مائل ایتمش . (رحمه الله)



اصحاب زید بن مسلم

(۱) عبدالرحمن بن زید بن قیس — اسودالکوفی النخعی نک
برادریدر . (۸۳) سکسان اوچ سنه سنده حجاج نام محلده وفات
ایتمشدر . (رحمه الله)

(۲) مالک بن انس — مالک بن انس بن مالک بن ابی عامر
الاصبحی امام دارالهمجره در . صاحب المذهب الجلیل در . کندیبی
تابعیندنی ، یوقسه تبع تابعیندنی ؟ بوراسی اختلافیدر . (۹۳)
طقسان اوچده طوغمش ، (۸۶) سکسان آلتی یاشنده اولدینی حالده
(۱۸۹) یوزسکسان طقوز ربیع الاولنده وفات ایتمشدر . جدی

ابوعامرك شرف صحبتنه نائل اولان بختيار اندنمی، دكلى ؟ بوراسی ده
اختلافيدر . (اصبحی) ملوك يمندن (ذی اصبح) ه منسوب ديمكدر، كه
امام مشاراليهك اجدادندن برسيدير . (رحمه الله)

(۳) حسن بَصْرِي — حسن بن ابی الحسن البصري اجله

تابعيندن برامام هامدر، كه زهدده، علمده، اظهار حقهده حائز اولديغی
مرتبه عاليه بيانندن مستغنی در. اوتوز سنه قدر كنديسنده اصلا كوكلك
واقع اولمايش وبومدت ظرفنده محل طاعتدن خارجه چيقما مشدر .
صحابه كرامدن بك چوق ذواتك شرف ملاقاتنه نائل اولمش وكنديسندن
خیلی احاديث شريفه روايت اولمشدر . علم تفسير وحديثده (حسن)
اسمی مطلق اولهرق ذكر اولندقهده مقصود، صاحب ترجمه حسن بصري
حضر تليدير . مشاراليهك جلاله شانی متفق عليه در . حضرت
فاروقك ارتحالندن ايكي سنه اول، زیب كهواره وجود و (۸۸)
سكسان سكز ياشنده ايكن (۱۱۶) يوز اون التي سنه سنده بصرهده
عازم دارالخلود اولمشدر . (رحمه الله)

(۴) عطاء بن ابی سلمه — عطاء بن ابی مسلم ابو عثمان

الخراسانی در. پدرينك اسمی ميسره، ياخود عبدالله ايمش . ارسال
وتدليس [۱] ايله معروف برامام صدوقدر . (۱۳۶) يوز اوتوز آلتیده
وفات ايتمشدر . (رحمه الله)

[۱] التدليس من الحديث قسمان، تدليس الاسناد وهو ان يروي
عن لقيه ولم يسمعه منه وعن عاصره ولم يلقه موهماً انه لقيه او سمعه منه .
والآخر تدليس الشيوخ وهو ان يروي عن شيخ حديثاً سمعه منه
فيسميه او يكتنيه ويصفه بما لم يعترف به كيلا يعرف .

(٥) محمد بن كعب القرظي — محمد بن كعب بن سليم القرظي

[١] ائمة اعلام دن بري اولوب زمان حيات نبى عليه اكل التحياته
طوغمش و (٩٨) طقسان سگز ياشنده اولديغى حالده (١١٧)
يوز اون يدى سنه سى مدينه ظاهرده ار نحال دار بقا اتمشدر . (رحمه الله)

(٦) ابو العالمة رفيع بن مهران الرباعي — خلافت صديقده

«رضى الله عنه» اظهار اسلام اتمش تابعى مشهور در . شيخين كند بسندن
روايت حديث اتمشدر در . مومى اليهك برتفسيرى واردر . (٩٠)
طقسان تاريخنده وفات ايشدر . (رحمه الله)

(٧) فحالك بن مزاحم — اهالى خراسان دن و تابعيندندر .

ابوهريره دن . ابن عباس دن ده «رضى الله عنهم» روايت حديث اتمشدر .
مومى اليه بعضلى تضعيف اتمشدر سه ده احمد و ابن معين توثيق ايشدر در .
(١٥٠) يوز اللیده وفات اتمشدر . وقيل غير ذلك . (رحمه الله)

(٨) عطية بن سعيد العوفى — «ابن جنادة العوفى الجدلى الكوفى»

كنيه سى : ابو الحسن در . صدوق ايسه ده يك چوق ده خطا ايدر مش !
شيعى ابدى . مدلس ابدى . [٢] (١١١) يوز اون برده وفات
اتمشدر . « رحمه الله »

(٩) قتادة بن دعامة السدوسى — «ابن دعامة ابو الخطاب

[١] القرظي — بالضم والفتح نسبة الى قريظه طائفة من اليهود .

[٢] معنى تدليس ، عطاء بن سلهك ترجمه سى ذيلنده بيان

اولتمشدر . فليراجع

السدوسی الاعمی الحافظ المفسر « (۱۱۷) یوز اون یدیده وفات ایتشددر .
« رحمه الله »

(۱۰) ربیع بن انس — « هو ابو حاتم البکری البصری
التابعی » — صدوق ایسه ده ابن حجرک دیدیکنه کوره او هامی غالب
ایمش ! (۱۳۹) یوز اوتوز طقوزده وفات ایتشددر . « رحمه الله »

(۱۱) سُدی — « اسماعیل بن عبدالرحمن بن کریمه » —
محدث مشهوردر . شمنی دیدی ، که : « سدی کوفه اها لیسندن
وتابعیندن بر مفسر صدوقدر ؛ شو قدر وار . که تشیع ایله متهدر .
ابن حبان ایسه آنی توثیق ؛ ابو حاتمده بالعکس تضعیف ایتشددر .
وفاتی (۱۲۷) یوز یکریمی یدیده در . (سدی) مدینه ده کاش (سد)
نام محله نسبت ایدلشددر . « رحمه الله »

§

اوچنچی طبقه

بو طبقه ده کی مفسریمه اقوال صحابه و تابعینی جمع ایدندردر .

(۱) سفیان بن عیینه — (عیینه) کوز معناسنه اولان عینک
تصغیرندن منقول علمدر . بیوک پدرینک اسمی (عمران) در .
کوفه لیدر . تبع تابعیندن وائمة اعلامدن برفاضل ذات ایدی .
کندیسی بک چو قلرندن روایت ایتدیکی کبی کندیسندن ده روایت ایدنلر
چو قدر . « وخرج له اصحاب الکتب الستة » . مکة مکرمه ده ساکن
اولوردی . مولدی : (۱۰۷) یوز یدی سنه سی اولوب وفاتی :
(۱۹۷) یوز طقسان یدیده در . اعور ایدی . « رحمه الله »

(۲) وکیع بن الجراح — « هو وکیع بن الجراح بن ملیح بن عبدی الحافظ الثقة » — (۱۲۹) یوز یکرمی طقوزده طوغمش و (۱۷۶) یوز یتمش التی ، یاخود (۱۷۷) یوز یتمش یدی سنه سنده وفات یتمشدر .
(رحمه الله)

(۳) شعبه بن الحجاج — « هو ابن الحجاج بن الورد الازدی الواسطی البصری الحافظ » — بوذات جلیل القدر ابن جوزینک دیدیکی کبی علم حدیثه امیر المؤمنین در . سفیان ثوری حضر تری دخی بولقب سامی بی آلان اعلم علمای تابعین در . (۱۶۰) یوز التمش تاریخنده وفات یتمشدر . « رحمه الله »

(۴) یزید بن هارون — « هو یزید بن هارون بن زادن السلی » — ثقات رواندن متقن ، عابد برکیمسه ایدی . سنی طقسانه متقارب اولدیغی حالده (۲۰۶) ایکی یوز التی سنه سنده وفات یتمشدر . (رحمه الله)

(۵) عبدالرزاق — « هو ابن هام بن نافع الیمانی الصنعانی » شیوخ امام بخاریدندر . قال معمر : « هو حافظ خلیق ان یضرب الیه اکباد الابل » . — وقال البخاری فی التاریخ الکبیر : « هو ثقة فما حدث به من کتابه فهو اصح » (۲۱۱) ایکی یوز اون برده وفات یتمشدر .
(رحمه الله)

(۶) آدم بن ابی ایاس — ابو ایاسک اسمی عبدالرحماندر . اصلی خراساندن اولوب منشأی بغداددر . اوراده شیوخندن اخذ علم ایتدکدن صکره کوفهیه ، حجازه ، مصره ، شامه رحلت واخیراً متوطن اولدیغی عسقلانده (۲۲۰) ایکی یوز یکرمی سنه سنده

ارتحال دار آخرت ایتشدر . خیار عباداللهن موقوف ، مأمون ،
متعبد برذات بزرگوار کریم الاخلاق ایدی . وراق ایدی . حین وفاتنده
سن شریفلری (۸۸) سکسان سکزه رسیده ایدی . « رحمه الله »

(۷) اسحق بن راهویه — « هو ابو یعقوب المروزی الامام
الزاهد الثقة المجتهد » — بودخی ابن حنبلک دیدیکی کبی علم حدیثده
امیر المؤمنین در . شرقده احیای سنته موفق اولان احد اعلام کاملین در .
بر مسئله مسموعی اولماشدر ، که آتی حفظ ایتمین ، برشی حفظ
ایتمامشدر ، که آتی اونوتسون ، (راهویه) پدری : (ابراهیم بن
مخلد التیمی الحنظلی) نک لقبی در . راه مکده تولد ایتمش بولندیغنه ،
(راه) ایسه فارسجه یول دیمک اولدیغنه بئاء آنکله تلقیب ایدلمشدر .
(۲۳۸) ایکی یوز اوتوز سکزه نیشابورده وفات ایتشدر . « رحمه الله »

(۸) روح بن عباده — « هو روح بن عبادة بن العلاء بن حسان
بن عمر البصری » — کثیر الحدیث ایدی . سنن واحکام وتفسیرده
کتب مفیده تصنیف ایتشدر . ائمه ثقاتدن ایدی . (۲۰۵) ایکی یوز بشده
ارتحال ایتشدر . « رحمه الله »

(۹) عبد بن حمید — « هو ابن النصر اللیثی بفیراضافه الی اسم
من اسماء الله تعالی وقیل اسمه عبد الحمید » — کینه سی ابو محمدر .
« وبه جزم ابن حبان وغیره » ثقاتدن وحفاظ حدیثدن صاحب التفسیر
برامام واجب التوقیردر . (۲۴۹) ایکی یوز قرق طقوزده وفات ایتشدر .
« رحمه الله »

(۱۰) ابو بکر بن ابی شیبہ — « هو عبد الله بن محمد بن ابی شیبة العبسی » [۱] اهل عصرینک احفظی ایدی . « اخرج له الاثمة الستة » (۲۳۵) ایکی یوز اوتوز ایش سنه سنده وفات ایتشد .
« رحمه الله »

§

دردنجی طبقه

کشف الظنونه صاهبی بو طبقه ده عبد الرزاق نامنده برقاتک اسمنی ذکر ایتسه ایسه ده یا نمزده کی کتب تراجمه بالاده بیانه اولناه : (عبد الرزاق به همام به نافع البیانی الصنعانی) ده ماعد اسمک ترجمه سنه تصادف اولنه مامشدر .

(۱) علی بن ابی طاحه — « هو علی بن ابی طلحة سالم مولى بنی العباس » . — حمص بلده سنده ساکن اولوب ابن عباس حضر تلرندن ارسال حدیث ایلردی ایسه ده آتی کور مامشدر . (۲۴۳) ایکی یوز قرق اوج سالنده وفات ایتشد . « رحمه الله »

(۲) ابن جریر — « هو ابو جعفر محمد بن جریر بن یزید الطبری » — تفسیر کبیر و تاریخ شهیر صاحبی اولان ذات فضائل عماتدر . مصنفاتی وسعت علمه . غزارت فضلنه دلالت ایدر . ائمه مجتهدیندن .
[۱] العبسی — بالفتح والسكون نسبة الى عبس بطن من غطفان .

ایدی . کیمسه بنی تقلید ایتماشدر . (۲۲۴) ایکی یوز یکر می درنده
آملده طوغشمش . (۳۱۰) سنه سی شوانک یکر می آلتنجی سبت کوئی
آخر نهارده بغدادده وفات ایتماشدر . « رحمه الله »

(۳) ابن ابی حاتم — « هو ابو محمد عبد الرحمن بن ابی حاتم

الرازی » [۱] — بوده صاحب تفسیر و ناریخدر . (۳۲۷) اوچ یوز
یکر می یدی سنه هجریه سنده وفات ایتماشدر . « رحمه الله »

(۴) ابن ماجه — ماجه . صاحب السنن (محمد بن یزید القزوی بنی) نک

لقبی در : جدی دکدر . [کذا فی القاءوس] بعضری ده دیدی که :
[ماجه] والده سنک اسمی اولوب مومی الیه آکا نسبت ایتماشدر .
نته کیم ابوبکر بن نقطه ، اسماعیل بن علیّه دخی والده لری نقطه وعلیه به
نسبت ایتماشدر . صاحب ترجمه ابن ماجه : [عبد الله محمد بن یزید
القزوی] در . که حفاظ احادیث نبویه دن بر ذات بزرگوار ایدی .
جلالت شانته بوکافیدر . که بعض ائمه حدیث مشار الیهی اصحاب
کتب سته دن امام مالک حضرت لرینه بدل اوله رق ذکر ایتماشدر .
بوصورتله مشار الیهک [سنن] الیه مسمی اولان کتابی ابن مالک

[موطاً] نام کتابنه بدل اولمش اولور . [۲۰۹] ایکی یوز طقوز
سنه سنده متولد اولوب [۲۷۳] ایکی یوز یتمش اوچ سنه سی رمضانک

[۱] [حاتم] بالحاء المهملة وکسر التاء و [الرازی] بتقدیم الراء

المهملة علی الزاء المعجمة نسبة الی الری وهی من مشاهیر بلاد الدیلم بین
قومس والجبال والزاء زائدة کما زادوها فی المروزی عند النسبة الی
مرو هذه .

ختمانہ اوچ کون قاله رق روز دوشنبه ده وفات ایتمش و روز سه شنبه ده دفن ایدلمشدر . حین ارتحالنده [۶۴] آلتمش درت یاشنده ابدی .
(رحمه الله)

(۵) حاکم — « هو ابو عبدالله بن محمد بن الیبع » — [بیع ،

اعراب ایدلدیکی وجه ایله بانک کسری ، یاء مشناک تشدید و فتحی ایله مضبوطدر] مومی ایله متناً و اسناداً ، جرحاً و تعدیلاً جمیع احادیث شریفه بی احاطه سی جهتیهله [حاکم] نامنی آلمشدر . « وهو اعزّ من مخّ البعوض و بیض الذرّ » (۳۷۸) اوچ یوز یتمش سکزده ارتحال دار بقا ایتمشدر . (رحمه الله)

(۶) ابن مردویه — « هو احمد بن موسی ابو العباس » —

بوکا مردویه مروزی دینیر . (۲۳۵) ایکی یوز اوتوز بشده وفات ایتمشدر . (رحمه الله)

(۷) ابن حبان — « هو ابو حاتم احمد بن حبان البستی » —

قرن رابع هجری محدثین کرامندن مسند صاحبی حافظ مشهوردر . (۳۵۴) اوچ یوزالی درت سالنده ارتحال ایتمشدر . [۸] (رحمه الله)

[۱] (حبان) حاء مهمله نك کسری ، باء موحدہ نك تشدیددی

و ترك تنوین ایله .

(البستی) باء موحدہ نك ضمی ایله افغانستانده کاش کابل

ملحقانندن هرات ایله غزنه آره سنده اشجاری ، انهاری چوق اولان
(بست) نام بلده یه نسبتدر .

(۸) ابن المنذر — « هو ابراهيم بن المنذر بن عبدالله بن المغيرة بن عبدالله بن خالد بن حزام بن خويلد المدني » — شیوخ امام بخاری دندرد. (۲۳۵) ایکی یوز اوتوز بش، یاخود (۲۳۶) ایکی یوز اوتوز التی سنه سنده مدینه منوره ده وفات ایتشدر . (رحمه الله)

§

بشبحی طبقه

(۱) ابو اسحق الزجاج — « هو ابو اسحاق ابراهيم بن محمد » — شیخ العربیه ، ادبه امام ، تصانیف جلیله صاحبی برفاضل هامدر . تفسیری مشهوردر . (۸۰) سکسان یاشنده ایکن (۳۱۱) اوج یوز اون برسال هجر یسنده بغدادده عازم دارالجنان اولمشدر . (رحمه الله)

(۲) ابو علی الفارسی — « هو الحسن بن احمد » — مشاهیر نحاندرد . (۲۸۸) ایکی یوز سکسان سکزده (نسا) ده طوغمش ، (۳۰۷) اوج یوز یدیده بغدادده داخل اولمشدر . برمدت اوراده قرائت و تحصیل ایله اشتغال ایلدکن صوکره دور بلاد ایدهرک حلبه کیدوب برمدت سیف الدوله بن حمدان یاننده قالمش و ایشته شو ائناده شاعر مشهور ابو الطیب احمد المتنبی ایله کورشمشدر . اورادنده فارسه کیدوب عضد الدوله بن بویه به بالانتساب علم نحو د (ایضاح) و علم صرفدن (تکمله) نام کتابلری مشار ایله عضد الدوله نامنه تألیف ایتشدر . بعد ذلک بغدادده عودتله اوراده ترک دغدغه قیل وقال ایله عازم دارالقرار اولمشدر . (رحمه الله)

(۳) مکی بن ابی طالب — « هو ابو محمد بن ابی طالب شیخ الصوفیة و اهل السنة » — تفسیرده و علوم سائزده متبحر ، مہمور الباطن و الظاہر بر علامہ کثیر المآثر ایدی . بیوک بر تفسیری وارد . (کتاب القوت) ی بر کتاب جلیدر . (۴۳۷) درت بوز اونوز یدیده (قرطبه) ده وفات ایتشدر . « رحمه الله »

(۴) ابو العباس المہدوی — کشف الظنونده بو ذاتک ده نامی مفسرینک طبقه خامسه سنده مقید ایسه ده یا نخرده کی کتب تراجمده ترجمه حالته تصادف اولنه ماہ مشدر . « رحمه الله »

(۵) ابو بکر النقاش — « هو ابو بکر محمد بن الحسن بن احمد الموصلی البغدادی المقری المفسر » — بونک ایچون مغربدر دینده وارد . (۳۵۱) اوچ بوز الی برده وفات ایتشدر . (رحمه الله) (روی عن ابی مسام الکعبی ومن هو فی طبقته و تفسیره لیس فیہ شفاء للصدور و الغالب علیہ القصص الا ان عمر الدانی اثنی علیہ .)

(۶) ابو جعفر النحاس — « هو احمد بن محمد المرادی » — مشاہیر ادباء و علمانددر . مصرده تولد ایتش ، صوکره بغدادده وسائر بلادہ رحلت ایدهرک اخفش ، زجاج ، ابن الباری ، نفطویه کی اکابر علما و ادباندن اخذ علم ایله متبحر اولمشدر . بعد الاکال و الاستکمال ، مصره عودتله اوراده (۳۳۸) اوچ بوز اونوز سکز سنه سنده آخرته انتقال ایتشدر . تصانیف مفیده سی وارد . (تفسیر القرآن ، کتاب اعراب القرآن ، کتاب المعانی و طبقات الشعراء) او جمله دندر . « رحمه الله »

§

آداب مفسرین

مفسر ك آتی الذکر اونه بسره علمنی علی وجه الاتقان
جامع اولسی لازم کلیر . بو علمله کماله انتسابی اولمانه
کوره تفسیر قرآنه تصدی شرعاً هار دکلمه :

- | | |
|--------------|-------------------------------|
| ۱ — لغت ، | ۸ — قرائت . |
| ۲ — نحو ، | ۹ — اصول دین ، |
| ۳ — تصریف ، | ۱۰ — اصول فقه ، |
| ۴ — اشتقاق ، | ۱۱ — اسباب نزول . |
| ۵ — معانی ، | ۱۲ — ناسخ و منسوخ ، |
| ۶ — بیان ، | ۱۳ — فقه ، |
| ۷ — بدیع ، | ۱۴ — (محمل و مبهم) ك تفسیرینی |
- مبین اولان احادیث .

اون بشجیسی ده علم الموهبه در . علم الموهبه بر علمدر ، که آتی
جناب ایزدمنان ، علمله عامل اولان مختار قولنه احسان اندر .

ایشته بو اون بش علم ، مفسر ك بهمه حال علی وجه الاتقان
والکمال جامع اولسی لابد بولنان علومدندر . مع هذا علم
تفسیر ایچون مفسر ك علوم سائر دده تجرری شرط لازمدر .

شوراسی ده معلوم اولسون، که تفسیر قرآن اوج قسمدر .
 اولکیسی: جناب حَقَّ مخلوقاتندن هیچ کیمسه بی مطلع
 بیورمامش اولدیغی علمدر . بوده گنه ذاته ، حقائق اسما
 وصفاتنه دائر کتاب کریمنک حاوی اولدیغی اسراردر ، که
 بوبابده تکلم ، کیمسه ایچون جائز دکلدر .

ایکنجیسی : حق سبحانه و تعالی حضرتلرینک کتاب
 حکیمندن اعرف الانبیا افندمزی مطلع بیورمش اولدیغی
 اسراردر، که بواسرارک حضرت نبی اکرمه شرف اختصاصی
 جهتله بوبابده آدن ، یاخود اذن ویردیگی اهل عرفاندن
 ماعداسی تکلم ایده مز . بعضاری اوائل سور ، بوقسمدندر
 دیدیلر .

اوچنجیسی: معانی جلیه و خفیّه دن جناب منزل القرآنک
 کتاب عزیزنده ابداع بیورمش اولدیغی علوم شریفه در، که
 آنلوی نبی اکرمه تعلیم، امتنه تفهمه ده جناب رسالتاً بلدیغی
 ترخیص بیورمشدر .

ایته بوقسم ثالثده دیکر ایکی قسم منقسم اولور .
 قسم اول : بحث و بیانی بهمه حال سماعه موقوف اولان

شیلزدر : اسباب نزول ، ناسخ و منسوخ ، قرآت . لغات . قصص
 امم ، اخبار ماهو کائن کبی .

قسم ثانی : طریق نظرله . برده الفاظدن استنباط صورتیه
 اخذ اوانه بیلن شیلزدر ، که بوده ایکی قسمه منقسم در . بری : جوازی
 خلف و سلف بیننده مختلف فیه اولاندر . بوده آیات متشابهاتک
 تأویلیدر . دیکری : بین العلماء متفق علیه اولاندر . بوده احکام اصلیه
 و فرعیه نك ، احکام اعرابیه نك استنباطیدر . بونده اجماع امت منعقد
 اولمش ، چونکه احکام مذکورہ اقبسه اوزرینه مبنی در . فنون بلاغت ،
 ضروب مواعظ ، حکم : اشارات دخی اویله اولوب ارباب اهلیمته کوره
 بونلرک قرآن مجیددن استنباطی ممتنع دکلدر .

ایسته شوامورک ماعداسی مقننه نری شرعی وارد اولاده
 « تفسیر بالرأی » در ، که بوده بسمه نوعدر .

اولیکسی : تفسیرک جوازینه توقف ایدن علومی تحصیل
 ایتمکسزین تفسیره قالمشوق .

ایکنجیسی : معناسنی الله تعالی دن باشقه بیلمین متشابهک
 تفسیری .

اوجنجیسی : مذهب فاسدی مقرر اولان تفسیردر که
 مذهبی اصل ، تفسیری اکا تابع قلمق صورتیه اولان تفسیردر .
 دردنجیسی : « الله تعالی نك بوندن مرادی شودر » دیه
 دیلسز اوله رق قطعياً معنی ویره ککدر .

بشنجیسی : استحسان ایله وهوایه متابعتله اولان تفسیردر .



﴿ صاحب اثر ك ترجمهٔ حالى ﴾

سرى پاشا كريدك قنديه شهرنده حلواجى زاده صالح
افنديك صلبندن (۱۲۶۰) سنه سنده كهواره زيب عالم
شهود اولمشدر .

اشناى شبابنده علمای بنامدن جورى افنديدن اخذ
علوم ايتمشدر .

(۱۲۷۷) تاريخنده جزيره نك مركز ادارسى اولان
حانيه يه كيدرک بر مدت اوقاف كتابتنده بولنمشدر .

متعاقباً استانبوله كاهرك بر مدت آرامدن صكره يكي شهر فناره
كيتمشدر .

اوراده مركز مجلس كتابتنده ، وزير تپه دنلى اسماعيل
پاشا ايله حسن تحسين پاشانك ديوان افنديلكر نده بولنمشدر .
تپه دنلى اسماعيل پاشانك خداوندكار واليدكى ائناسنده
بروسه يه كيدرک ينه وزير مشاراليهه ديوان افنديلكى
ايتمشدر .

صدر اسبق ادهم پاشانك يانیه والیدکننده کتابت
خصوصیه سنده بولمشددر .

(۱۲۸۴) ده یانیه (۱۲۸۵) ده آیدین ولایتاری
مکتوبچی معاونلککریخی ایفا ایتمشدر .

(۱۲۸۶) ده پرزرین ولایتک انای تشکلسنده مکتوبچیلقله
پرزرینه کیدرک برقاچ سنه قالدقدن صکره در سعادتیه عودت
ایتمشدر .

(۱۲۸۹) ده طونه ولایتی مکتوبچیسی اولمشدر .

(۱۲۹۲) ده طونه ولایتک مرکزی اولان روسچقدن
بهکه و اورادن بنالوقه متصرفلقلرینه کیدرک بنالوقه دن ده
(۱۲۹۳) مایسنده ودینه متصرف اولمشدر .

مخاربه زانهدده ودینده بولنه رق ماذوناً در سعادتیه عودتی
متعاقب (۱۲۹۴) سنه مالیه سی حزراننده شمعی وارنه
قومیسر لکنه مأمور ایدلمشددر .

ینه (۱۲۹۴) سنه سی ایچنده قره سی متصرفلقلغه کیتمشدر .
(۱۲۹۵) سنه مالیه سی مارتنک برنجی کونی طربزون
والیدکنه تعیین اولمشدر .

طر بزوندن منفصلاً در سعادت عودتندن بر قاچ ماه صکره
(۱۲۹۷) سنه سی کانون اولنک یکر می طقوزنده قسطمونی
والیالکنه مأمور ایدلمشدر .

(۱۲۹۸) سنه سی کانون نائینک بشنده مأموریتی
قسطمونیدن دفعه نائیه طر بزون والیالکنه تحویل ایدلمشدر .

(۱۳۰۰) سنه سی تشرین نائینک اون یدیسنده
طر بزوندن انقره والیالکنه تحویل مأموریت ایلمشدر .

(۱۳۰۲) تموزی ایچنده تحویلاً سیواس والیسی اومشدر .

(۱۳۰۴) رجبنک یکر می دردنده سیواسدن دیار بکر ،

(۱۳۰۶) رجبنک یکر می دردنده آطنه، (۳۰۷) سنه قمریه سی
ربیع الاولنک یکر می طقوزنده بغداد والیالکرینه کیدرک
بوراده ده (۳۰۷) سنه مالیه سی تموزینه قدر بولنمشدر .

بغداددن دیار بکر والیسیله بجایش ایدلمشدر . (۱۳۱۰)

سنه سی ایلولی او اخرینه قدر دیار بکر ده بولنوب برای تداوی
مأذوناً در سعادت کلمشدر .

مبتلا اولدیغی قلب خسته لغینه بر سنه دن زیاده بوراده ده
اوغراشدیغی حالدیه بر صورتله افاقت بوله میهرق هنوز
سن کالنده ایکن (۱۳۱۳) سنه سی جمادی الاخراسنک یکر می

در دنجی چهارشنبه کیجه سی ساعت بر راده لرنده ذکر اوقلباً
مشغول پروردکار اولدینی حالده تسایم روح ایتمشدر .

(روح الله روحه و او فر فی فرادیس الجنان فتوحه) .

شرفصادر اولان اراده سنیة جناب شهر یاری موجبجه
مرحوم مشارالیه سلطان محمود تربسی حظیره سنده ودیعه
رحمت رحمن ایدلمشدر .

بالاده خامه کذار تحقیق ایدیلن مأموریتلرینک کافه سنده
مرحوم حقیقه خدمات مهمه ایفاسنه و یک چوق آثار نافع
اجراسنه موفق اولمشدر .

مرحوم بوکون ایادیء تقدیر انامده متدائر اولان
مؤلفات معتبره سنی حیاتنک هیچ بر دقیقه سنی بوش کچیر مامک
امل خاصیه حصوله کتیره بیلمشدر .

مشارالیهک آثاری شونلردر :

جلد

۳

سر قرآن

۳

احسن القصص

۲

سر فرقان

۱

سر انسان

۱	سر تنزیل
۱	سر استوا
۱	رؤیت باری حقننده رساله
۲	شرح عقائد و حاشیه لرینک ترجمه سی
۱	نقد الکلام فی عقائد الاسلام
۱	ارآء الملل
۱	روح
۱	نور الهدی لمن استهدی
۳	مکتوبات سری پاشا
۱	غلطات
۱	نمونه عدالت
۱	لك دوقه كین [۵]
۲۴	

مرحومك مکتوباته داخل اولمامش دهاپك چوق لایحه لر
 و مکتوب باری واردر که بونلرک جمعیه آیریجه بر رساله شکلنده
 نشری مقرر در .

[*] ارناودرک اخلاق و عادات قدیمه سی حقننده در .





« سرى پاشا مرحومك بىك اوج يوزاون بر سنه سى »
« مايسى اچنده چيقارنديغى اك صوك رسميدر »



3 1761 07290550 8

BP
70
S57
1896